

# **Epeso Leta**

## **Polimna Iriki Epeso Sosim pilwa**

### **Leta**

### **Isipkita Yitkak**

Onggityam Epeso Leta irika riga re Polte. I ton onggit win nat yirikonj, re ton nimog kemag kima sibimetind yibnenonj Roma taunind, ama rika A.D. siksti (60) kemag nat. Si itemb re ji leta, rika ma Epeso sosi nena mana erikawonj, aji kea toda kwa ji sosi akasinonj, opi re rina re Epeso taun wusind wekenonj. Onggit winind Epeso yibnenonj re ukoi jog nony ijai taun na dide get ke inyiny jog taun na ninda sosi wa.

I onggit letand Pol ukoi jog yisipkeny re sosi yipand awou gatab e dide Godimna mop gatab e, it re da Ton komkesa gasa pumb tunggind dide gowukoyind yipand tamniny yipaina moptekip wirand. Si itemb moptekip re Yesutemb. I onggityam yipand awou mile mapenaemb Pol yirikonj da komkesa gar ke utkunda riga re yipaina b'ubigawar im Yesum pilind. Odedep ton b'ogla towalenggyam towalenggyam singi b'eyeninem.

I Pol kwa ita onggit letand sosi gatab yisipkeny. Ton ma inte yisipkis, it re met orangi yibim yipa pipmetind, aji inte yisipkis it re rinte komkesa gar ke utkunda rigap yipand b'eomkiti wekeny. Itemb re ji sosi nok e ogenaya da, "yipaina gowukoi sosi". I Pol sosimna yipand awou mile odede wip e yisipkeny ringmim re jiwind kipear moptekip

kima b'inkiti wekeny, i ringmim re metind kipear met emorkam motir kumbind b'inkuri wekeny, i dide ringma re kongga ti leowim pilind b'inkiti wibim.

### *Simesime Yitkak*

<sup>1</sup> Simesime! Kon Pol ten. I God naska nata kea singi yoramitonj kor pilwa Keriso Yesumna itmikitijog riga awowim. Si yu kon ita onggityam itmikitijog riga wiko omnika yiyenyin wanim. A si kon itemb leta yiriken re wa pilwa e yepim re win Godimna yina riga wekenyit Epeso taunind i dide Keriso Yesund nony yijaeneya.

<sup>2</sup> Mera B'u God ake Yonggyam Yesu Keriso towa pilke wurar dide ngimbla win kima.

### *God Tina Riga B'ogil Tamniny Kerisom Nyi kima*

<sup>3</sup> Men Godind ukoi kana yasourenu yete re mera Yonggyam Yesu Kerisom B'u yibim. Mop nokip Ton kea men wip niyeninonj Kerisond gar ke utkundam, i ingkenaemb ket Ton men wingawinga ke b'ogil nomneninonj komkesa pumb tunggimna b'ogil ke.

<sup>4</sup> Si odede nya kenaemb God b'ogil nomninonj. Re Ton maka gowukoi yotobarkonj, Ton kea men singi niyeninonj. I ingkenaemb ket Ton nobagenjinonj Kerisond gar ke utkundam, nokim da idenat men Ti wipind yina riga dide b'injawa kesa riga taukindam.

<sup>5</sup> Mop nokip God Tinajog sam kima singind yipa yit yisamkonj odede da, Tina B'iga Yesu Kerisond itmikis gowukoi wa. I Ton kwa ket onggityam Tina isamki ririrind men nobagenjinonj, nokim da ra Yesu Keriso meraina negir mile awir tamnikiny,

si ingkaimemb ket Ton men Tina owabinti b'igam notininy.

<sup>6</sup> Si God Tina B'iga Yesu Kerisond ma sobijog na singi yiyenonj, aji Ton Tin yitmikitonj mera pilwa men kear omnam. Si ra men Yesund gar ke utkunda ke okasu, God opima mera jabajaba yiyag wurar notgoniny. Si nangga pena God odede mera gatab yisamkonj re, nok mana da idenat men Tin esourena iyenyu onggit Tina b'ogil inyomarena kima wurar mile gatab.

<sup>7</sup> Si itemb Tinajog B'iga Yesu re kea kus yigmarkonj i ket uj awonj. I ingkenaemb ket Ton negir milemna mira Godim pilwa yoramitonj men itringendam. Seg God ket meraina negir mile awir amninonj. Si odede nya ke God ma sobijog na Tina wurar nokainonj.

<sup>8</sup> I God kwa onggityam Tina wurar kena kupkakupka meranim komkesa b'ogil multekip dide wumir oikindena eyeninonj.

<sup>9</sup> Si God naska nata yisamkonj da Keriso ita Tina wigawiga singi mile omnik. I itemb mile re wigawiga na yibnenenonj riga wa pilke. Aji God kea b'ogil sam kima men wumir nomninonj onggit wigawiga isamki yit gatab.

<sup>10</sup> Si God nok mana odede yisamkonj da ra win ririrkip tainy onggityam mile aukam, idenasimemb Ton komkesa otobarki gasa teyeniny Kerisom pilwa yipand b'inkitam Ti pilind, i idenat ket Keriso wip teyeniny komkesa gasa rinsim re Ti pilind yipand wekeny pumb tunggind dide gowukoyind.

<sup>11</sup> God ma jabajaba im komkesa mile omnika eyeniny, aji Tina isamki singi ririr nasim. Si

onggit penaemb Ton kea komkesa gasa naska kana get ke isamka eyeninonj omnikam. Si onggityam Tina naska get ke isamki ririr nat Ton medaka kwa nobagenjinonj Kerisom pilind yipand b'inkitam, si ingkenaemb ket men Tina owabinti b'iga aukitondam.

12 Si God sina Ju riga naskajog noramisinonj Kerisond yir ungaukam Ti pilke yirkokar okatam. Nokim da idenat God sin notinkiny Tina b'ogil inyomarena esourena rigam, i dide kwa ingkaimemb todaka komkesa Tina rigap esourenyi Tina b'ogil inyomarena.

13 I widaka, God ma obagiki kesa riga kea Kerisom pilind yipand b'inkurtondam, re win onggityam iminjog yitkak yutkundonda, it re God ma b'ogil yirkokar bage yit ringkae re win yirkokar yokatenya. Ngirpu re ket win gar ke utkunda ke Kerisond yokatonda, si God kea Yinayina Wingawinga wa akainonj Tina tirir omni yitkak ririrind. I ingkenaemb ket Yinayina Wingawinga Kerisomna nyi kima Tina tirir omni mal autikinonj waina kukipind da win re Tinajog riga im.

14 God kea tirir yomnonj meranim ninda wurar gasa owabintam. I Ton ket naska Yinayina Wingawingand mera yitmikitonj i Yinayina Wingawingate ket iminjog omnena yiyeny da men opima onggityam Tina tirir omni wurar gasa awabindenendandam. Nokim da ra Keriso meraina kupkakupka negir milemna mira Godim okainy men itringendam, si idenat men ket Tinajog b'iga notinkiny. Si God nok mop paim odede omnika eyeniny da idenat men esourenyu Tina b'ogil inyomarena.

### *Polimna Yir Opmita*

<sup>15</sup> Si onggit mop paemb re kon wa gatab yit utkundenond da win opima iminjog Yonggyam Yesund gar ke utkunda ke yokatenya, dide win opima komkesa yina riga wa pilind singi b'iyena mile omnika yiyenya,

<sup>16</sup> kon ita koina yir opmita winind wen nony eyeneninyin, dide makwa ita yipendenenyin wanim siteket yit omnenam Godim pilwa.

<sup>17</sup> I Yinayina Wingawinga re wingawinga ke b'ogil multekip ogona riga e, dide Tonte ket God ma yitkak pita wa tamnikiny Godim wumir aukam. Si kon yir opmitenyin wanim odede da mera Yonggyam Yesu Kerisomna God, b'ogil inyomarena kima B'u, Ton wa takainy Yinayina Wingawinga. Si idenat ket win b'obogil Godim wumir taukindam.

<sup>18</sup> I kon kwa yir opmitenyin da Yinayina Wingawingat waina gar ranyowain dide repangkain. Nokim da idenat win wumir taukindam da God wen ara emokinonj re onggit warim b'ogil isma okawa mana, i kwa nokim da idenat win wumir taukindam da God odede wip b'ogil inyomarena kima yindangir auki owabinta gasa im angonjeniny yina riga wa okawam,

<sup>19</sup> i dide kwa nokim da idenat win wumir taukindam da yu God odede wip ukoijog danda e mera ogona niyeniny yepim re men Yesund gar ke utkunda ke yokatenyu. Si God re Tina ukoijog danda kaim wiko omnika eyeniny, i onggityam Tina omnika ririr nate Ton danda ogona niyeniny.

<sup>20</sup> Si re God itemb Tina danda yingawonj Kerisom pilind, Ton kea Kerisond uj ke yutnyitonj dide ket juwai kima pipmetind yomitonj Tina yimjog

yim tab ke de pumb tunggind.

<sup>21</sup> Si ingkenaemb ket God Kerisond dea de pumbjog danda pipmet wa yurowatonj. Si komkesa b'engabenga wip danda re Tina danda wira nasim wekeny, opi re komkesa b'ogil dide negir aneru yepim re wekeny wip iyena danda kima, ukoi nyi kima, danda kima o yonggyam nyi kima, i dide komkesa nyi riga yepim re wekeny onggit gowukoyind dide daka kwa onggit gowukoyind rinte ra ik.

<sup>22</sup> I God komkesa gasa aramkinonj re Kerisomna pis wirand danda ondratenam towa kumbind, dide Ton ket Kerisond ukoi jog mopyamim yoramitonj sosind komkesa otobarki gasa kumbind mop riga awowim.

<sup>23</sup> Si sosi re Kerisomna ji e yete re komkesa gasa ririrkipjog amnikeneniny komkesa gatab ke. Si Kerisotemb Tina danda ke sosi yindangir yomnikeneniny komkesa gasa ririrkip omnikam.

## 2

### *Kerisomna Wurar kae Yirkokar Okata Mile*

<sup>1</sup> I naskand win re maka Godind yutkundenonda, dide negir mile na amnikenentondam. Si onggit penaemb win wingawinga ke uj wekenot.

<sup>2</sup> I onggit winind re win negir milend wekenot, win wimena tuwot re onggit gim ke gowukoi rigaina wimena nya ririr nat, dide win Satanand yimta undoka yiyonda yete re komkesa negir wingawinga wip eyeneniny onggit gowukoyind. Si yu onggit Satanat ita wiko omnika eyeniny towa wingirind yipand yepim re Godim utkunda kesa wekeny, i ket wip eyeniny de negir mile wa.

<sup>3</sup> Si naskand medaka komkesa wimena tuwond re meraina gim ke gowukoi rigaina mile singi ririr nat. Si men kwa ket yimta undoka eyentondam re ji ke omnika mile singi na dide nony menamena ke omnika mile singi na rina re meraina gar ke opeka wuwenenonj. Si ninda riga yepim re gar ke utkunda kesa wekeny, ton opima Godimna ukoi soro kima b'isagika okasi dem. I medaka get ke ukuktondam dide wimena tuwond re odede ton kima yipa wip na.

<sup>4</sup> Aji God yibim re kear ke yindangir e dide Tina singi b'iyena re ukoi jog e, si onggit Tina ukoi jog singi kena men singi niyeninonj.

<sup>5</sup> I ingkenaemb ket daka God Keriso kima men yipand nomninonj dide ket meraina wingawinga yilo amninonj Keriso kima yipand, re men Tina yit utkundi kesap uj wekenenond. Si men yirkokar yokatonda re Tina wurar kena.

<sup>6</sup> I Godit ket Keriso Yesu kima men yipand nutnikinonj wingawinga ke, dide ket Keriso kima yipand pumbjog pipmetind nomisinonj de pumb tungg wa.

<sup>7</sup> Nokim da ra jogjog riga ukka tuweny onggit gowukoi wa, idenat God towanim wumirim pita tamnau da inta Tina wurar nena ukoi jog, aji awir e kwa rinte b'enga b'ogil wurar yibim. I Keriso Yesu kea kupkakupka mile yundwatonj negir mile riga wa yirkokar okawam, si odede kenaemb men kear nomninonj.

<sup>8</sup> Mop nokip win gar ke utkunda ke yirkokar yokatonda re Godimna wurar kena, i itemb mile aukonj re ma wa pilkena aji Godimna yiyag wurar kena.

<sup>9</sup> Si God yirkokar okata mile pita yomnonj re Tina wurar kena, aji ma gog yit owama kena o ninda b'ogil wiko omnika kena. Nokim da idenat maka yipa rigat b'atisoureny da, "Kon yirkokar yokatond re koina omnika kena."

<sup>10</sup> Mop nokip yu men ija im-a odede wip aukindam rija na re God nomnikinonj. Si God men odede Keriso Yesum pilke b'usaya wingawinga ke notobarkinonj re, nok mana da idenat men Tina b'ogil wiko omnikam wimena tuwenyin rina re Ton naska get ke tula angonjeninonj.

### *Kerisom pilind Yipaina Sosi Awowim*

<sup>11</sup> Si onggit paemb win nonyik b'amenina da naskand win ukuktodam re God ma obagiki kesa riga na. Si Ju rigap towalenggyam b'agenaenento da sin re God ma obagendi tirir omni mal wugim ipki God ma riga im, aji wanim re da God ma obagendi tirir omni mal wugim ipki kesa riga im. Si itemb re mile rigaina yim ke jiwind nena mal omniki e.

<sup>12</sup> Si win kwa nonyik b'amenina da onggit kesam peba winind wa rawir kwa warim b'ogil isma ebnaionj yir ungaukam da, men ita Kerisom pilke yirkokar okasu. Nokip win re ma Israel kantri riga na wekenot. I win re God ma outinti tirir omnijog mal kesa riga na dide onggit Godimna wurar ke ewaikiti riga na wekenot. Si onggit penaemb win maka nanggamog warim b'ogil isma emdenentodam dide kwa Godim wumir kesa na wekenot onggit gowukoyind.

<sup>13</sup> Si win re naskand Godim pilke pajapaja na wekenot, aji win yu kea Keriso Yesund gar ke



utkunda ke okati im wekenyit. Si God Kerisomna wul b'agbag kus kena wen Ti wus wa amninonj.

<sup>14-15</sup> I win God ma obagiki kesa riga dide sin Ju riga re nimog gu na gangga b'akalendonda dide ket geja riga pila wetaweta ebnonda. Si onggit penaemb mera ganggand dir omjiki yibnonj. Aji Keriso re meranim ngimbla omnika riga e. Si onggit penaemb Ton wul b'agbagind b'uwonyitonj. I ingkenaemb ket komkesa Mosemna b'ingawa yit waina gog awir amninonj rinsim re iriki wekeny Mosemna gog peband. Si odede nya kenaemb Ton onggityam mera ganggand dir yiporkonj. Nokim da ra win God ma obagiki kesa riga dide sin Ju riga Kerisond gar ke utkunda ke Ti pilind yipand taukindam, idenat Ton men yipaina gu riga notinkiny Tina sisil ji it re sosi otobarkam, dide ket mera ganggand ngimbla omnika iyenj.

<sup>16</sup> I kwa nokim da ra Keriso Tina wul b'agbagind uj ke men nimog gu riga yipand notinkiny Tina ji sosi wa, idenat ket Ton men nitiyeniny Godim pilwa rigariga omnenam. Si nok penaemb Keriso wul b'agbagind uj awonj da mera nimog gu ganggand geja mile awir ominy onggit wul b'agbag ke.

<sup>17</sup> Si re ket Keriso ikonj, Ton God ma yitkak pitapita omnena yiyonj ngimbla oramitam win God ma obagiki kesa riga wa pilind yepiya re win Godim pilke pajapaja wekenot, dide daka kwa ngimbla oramitam Ju riga sowa pilind yepiya re sin Ti wusind wekenond.

<sup>18</sup> Si men odede Kerisomna wiko kenaemb yipand aukitondam. I ket yipaina Yinayina Wingawingate men nimognimog gu wip niyeniny

Abum wip wa awowim.

<sup>19</sup> Si onggit paemb win re makwa ngai b'usaya yipa b'enga kantri ke obayam im o b'enga yipa kantri riga im taindam, aji win re kea God ma pumb tungg riga im aindam yipand komkesa yina riga kima. Si win re God kima Tina metind wimena riga im.

<sup>20</sup> I kwa daka men re met pila im rina re God yorangonj onggit imnina kesa met orangapu pipmetind rina re itmikitijog rigap dide bageyamip yispiko. Si kwa Keriso Yesu Tilenggyam yibim re onggit met wugind oramiti iminjog isnawa kima Motir e onggit met emorkam.

<sup>21</sup> Si opi re men gar ke utkunda ke Keriso Yesum pilind yipand auka wuwenyin, si ingkaemb ket God men komkesa met kipear pila ikoka niyeniny yipand Kerisom pilind. I opi re men Yonggyam kima yipand wimena wuwenyin, Tonsim men utnika niyeniny, nokim da idenat men ket Tina yinamet auka tuwenyin wingawinga ke.

<sup>22</sup> Si widaka kwa kea ket gar ke utkunda ke Keriso Yesum pilind yipand aukitondam. Si Yinayina Wingawingate kwa wen oranga eyeniny sin kima yipand, nokim da idenat win taukindam Godimna wimenapu met.

### 3

#### *Polimna Wiko God ma Obagiki kesa Riga Wanim*

<sup>1</sup> Si onggit yit mop paemb kon, Pol Keriso Yesum nyi kima sibibmet riga nibnyin win God ma obagiki kesa riga map.

<sup>2</sup> Si win iminjog kea utkundenonda da God Tina wurar kena kor nokawonj itmikitijog riga nyi God ma obagiki kesa riga wanim wiko omniam.

<sup>3</sup> I God kea ken nouyawonj Tina wigawiga isamki yit, i ket wumir nomnenonj odede rija na re kon wip ke sobijog erikinyin onggit letand.

<sup>4</sup> Si ra win opimemb yitkak tagenkindam, wida ririr e onggit gatab wumir okatenya rina re kon wumir yokatond onggit wigawiga yitim it re Kerisom gatab.

<sup>5</sup> I God maike kwa onggityam wigawiga yit riga wa pilwa wumir yoramitenonj yepiya re naska winind b'usmurena tuwonj. Aji yu Ton Yinayina Wingawinga na ingaena yiyeny onggityam wigawiga yit ouyaukuram yina itmikitijog riga wa pilwa dide bageyam wa pilwa.

<sup>6</sup> Si itemb ji wigawiga yit da God ma obagiki kesa rigap opima God ma b'ogil yirkokar bage yit akatenanj, i ingkaemb ket Keriso Yesund gar ke utkunda ke yokatenyi. Si ton Ju riga kima yipand gilgil Godimna owabinti riga im aukanj, i Ju riga kima yipand kipear im aukanj yipaina jiwind, i dide ket ton Ju riga kima yipand gilgil God ma tirir omni b'ogil yingg okatena riga im aukanj.

<sup>7</sup> I God kor ukoi jog wurar nokawonj, si ingkenaemb ket kon onggityam Tina yiyag wurar ririrind Tina b'ogil yirkokar bage yit wiko riga awond. I kon ket itemb wiko yiyenyin re Tina wiko omnika danda ririr nate.

<sup>8</sup> I kon re sobijog riga en komkesa yina riga wa wingirind. Aji God inaemb ji ukoi jog wurar nokawonj, nokim da idenat kon Kerisomna ipendi kesa komkesa b'ogil wurar gatab b'ogil yirkokar

bage yit pitapita omnenyin God ma obagiki kesa riga wa pilwa.

<sup>9</sup> I kwa nokim da idenat kon komkesa riga wa pita tamnaen onggityam Godimna wigawiga isamki yit rina re komkesa gasa otobarkayam God egiti yowamenenonj otomapu ke ngirpu yu.

<sup>10</sup> Si ija emb ji Ti onggitim mop da yu komkesa wip iyoi riga dide danda kima nyi riga de pumb tunggind yir ongi itemb sosi, i ingkaimemb todaka wumir taukanj Godimna jogjog b'engabenga b'ogil multekip gatab.

<sup>11</sup> Si itemb re Godimna dadal ngirpu kesa isamki mop e, i God ke onggityam isamki mop mera Yongyam Keriso Yesum pilind ririrkip yomnonj.

<sup>12</sup> I men itemb Keriso Yesund gar ke utkunda ke yokatonda, i ingkenaemb ket Ton kima yipand aukitondam. I men b'ogil im Godim wip wa wuyin moga kesa dide nony b'ijawa kima.

<sup>13</sup> Si onggit paemb win goro gar bebig taininam koina b'idgotnena gatab rinte re kon yu yokatenyin wa map. Si onggit koina b'idgotnenat wanin yii re b'ogil inyomarena e.

### *Kerisomna Singi B'iyena Mile*

<sup>14</sup> Si onggit mop paemb kon kumsos b'amka nekenyin B'uim pilwa,

<sup>15</sup> yet re komkesa gu b'engabenga nyi aekinonj pumb tunggind dide onggit gowukoyind.

<sup>16</sup> Si kon B'und yigekenyin da Ton itmikis Tina Wingawinga waina kukip wa pilwa, i ingkaimemb ket Ton Tina danda ke wen gar seo tamnikiny Tina b'engabenga b'ogil inyomarena ririrind.

17 I kwa yigekenyin da win b'obogil gar ke utkunda ke Kerisond okatenya, i ingkaemb ket Keriso waina garind wimena ikeny. I kwa win ap b'atimkenenindam dide danda kima towinkindam singi b'iyena milem pilind.

18 Nokim da idenat win danda okasya yipand komkesa yina riga kima wumir okatenam da, Kerisomna singi b'iyena mile ridede warabag e, i ridede pin e, i ridede uski e, i ridede ngortod wa e yibim.

19 I kwa win danda okasya ipindenam Kerisomna singi b'iyena mile rinte ra makwa yipa rigat ririr e okas tina wumir ke. Nokim da idenat God wen ririrkip yindangir tamnikeneniny komkesa gatab ke odede ringma re God Tilenggyam komkesa gasa ke ririrkipjog yindangir yibim.

20 I God ita mera wingirind Tina ukoijog danda ingaena yiyeny. Si ingkaemb God ririr e komkesa gasa tamnikiny nangga mana ra men igekenyu i nangga mana ra men nonyik b'atimdenindam. Ma Ton onggit nena im tamnikeniny, aji Ton opima tegoukeniny dide ogenka kesa pumb wa tesmureniny omniam.

21 B'ogil inyomarena onggit Godim pilwa sosim pilke dide Keriso Yesum pilke dadal ngirpu kesa waritawarita, iminjog.

## 4

### *Yipaina Jiwind B'inkitam*

1 Si onggit paemb kon yete re sibibmet riga nibnyin Yonggyamimna wiko map, wen tugoinyin

da win ija na God ma ara emoki ririrind b'obogil wimena tuwenyit rija na re Ton wen ara emokinonj wimenam.

<sup>2</sup> Si win ita winind walenggyam gou wa tainindam, i nony kima musik wimena milend tuwenyit. I mimkam ke wimenand tuwenyit dide ket walenggyam walenggyam singi b'iyena kima ngolengole tainindam yepiya ra wa pilind negir mile tamnikanj.

<sup>3</sup> I win b'ogla kupkakupka danda tengaindam sosi emorkam rina re Yinayina Wingawinga ngimbla ke wen patpat ebginonj dide ket yipand amninonj.

<sup>4</sup> Win re yipaina ji sosim pilnasim wekenyit, i yipaina Yinayina Wingawingate wen wip eyeniny. I daka God wen komkesa ara emokinonj re odede yipaina warim b'ogil isma yir ungawa mana.

<sup>5</sup> I wa wingirind inta yipaina Yonggyam yibim, i inta yipaina gar ke utkunda mile yibim, i dide kwa inta yipaina baptiso mile yibim.

<sup>6</sup> I inta yipaina God yibim yete re mera komkesa riga wa B'u, i yete re wip eyeniny komkesa riga, i wiko omnika yiyeny komkesa riga wa wingirind, i wimena yikeny komkesa riga wa wingirind.

<sup>7</sup> I Keriso men yipayipa riga tondon notonaeninonj Tina yiyag wurar okawam, i onggit tondon ririr nat ket yipayipa wurar nogoninonj sosi wiko omnikam.

<sup>8</sup> Si onggit paemb yina pebat odede yindenya da,  
 “Re Ton pumb wa b'urowatonj, Ton kea sibibmet riga eyinonj Ton kima yena re Ton akasinonj,

ı daka ket Ton yiyag wurar agoninonj Tina riga wa.”

<sup>9</sup> Si nangga e ji yitkak “Ton b'urowatonj”? Ma nok ma yisipkis da Ton kea pumb ke inkonj de onggit gowukoi wa?

<sup>10</sup> Si Keriso re intemb ji riga yet re inkonj, ı yet re b'urowatonj pumb teretere wa dea de komkesa wub gou wa amninonj. Nokim da idenat Ton yindangir tamniny komkesa wub ake gowukoi Tina danda ke.

<sup>11</sup> Si Keriso sosim nında riga yogoninonj re itmikitijog riga na, ı nında re bageyam na, ı nında re God ma b'ogil yirkokar bage yit pitapita omnena riga na, ı nında re pasto na o ouyaena riga na.

<sup>12</sup> Si nok mana sosim yogoninonj da idenat Ton yina riga tangonjeniny sosi wıko omnıkam dıde Yesu ma ji sosi orangam.

<sup>13</sup> I men ite re wıko omnıka yiyenyu, si ingkaemb ket men komkesa yıpaina gar ke utkunda mile okasu, ı ket Godimna B'ıga gatab kupka wumir okasu, ı ket wingawınga ke inıka wuyın ngırpu ra rigajog taukindam, ı dıde itemb ket men Kerisomna kupka ji rırırkipjog omnyu.

<sup>14</sup> Nokim da idenat men maka ket papa b'ıga tekenyın. I nında rigap opima rabem omnena nya ke riga ouyaena eyenanj God ma yitkak, nokim da idenat ton onggit ijongki ouyaena ke riga wıp teyenanj b'anygınena nya yımta undokam. Aji men komkesa makwa opima nony tendamarand tekenyın odede ringma ra wurop gıga oskandena iyenyı dıde komkesa b'engabenga ribıp wıp iyenyı wıp wa dıde kak wa.

<sup>15</sup> Aji inte da men singi b'iyena mile kima imınjog

yitkak nena opurena teyenindam, i idenat ket men komkesa nya ke towinkindam odede ite re Keriso re dide yete re mera moptekip yibim.

<sup>16</sup> I men kupka ji aindam re Kerisom pilkaim. I komkesa b'engabenga kipear yipand b'inkuranj yipaina jiwind dide ket yipand gilgil itemb ji emorki yowamenenyi re komkesa kipear waina kokmop kaim. I yipayipa kipear wa opima towa b'engabenga wiko omnika eyenenanj, i ingkaemb ket itemb ji inika yik, i ket singi b'iyena mile ke b'aranga yik.

### *Gar ke Utkunda Rigaina Wimena Yirkokar*

<sup>17</sup> Si onggit paemb kon Yonggyamim nyi kima wen itemb yit tamninyin da win goro kwa wimena tuwenyit odede ringmim re gar ke utkunda kesa rigap wimena wuweny towaina kip kesa nony menamenand.

<sup>18</sup> Mop nokip Satanate towaina nonykok sibibind awameneniny, i tonte Godimna yirkokarim pilke ten wetaweta amnikeneniny, nokip ton re wumir kesa im wekeny God ma yitkak dide towaina gar re rogilkak im wekeny God ma yitkak utkundam.

<sup>19</sup> I ton awir im tepindenanj nangga im b'ogil o negir Godim wipind. Si ton towalenggyam b'akaenenanj re negirjog mile wa im, nokim da idenat ton omnika teyenanj komkesa ingar kima kilkil mile, i kinyir aena tuweny onggityam mile oikindena iyanam.

<sup>20</sup> Aji win maka odede wip ke Kerisom gatab b'auyaentondam.



21 Si win kea Ti gatab utkundenonda, i re win Tin gar ke utkunda ke yokatonda, win odede na b'auyaena yokatonda da iminjog yitkak yibim re Yesum pilnate.

22 Si onggit paemb win waina kesam kukip atogikina! Nokip win naskand kesam wimena yirkokar mile na yimta undokenentondam, si odede penaemb waina kukip b'anyginena singi ke itkikijog na wekenonj.

23 Aji win waina kukip dide nonykok kupkakupka sisil tamnikindam.

24 I win sisil kukip b'ikokinam rinsim re otobarki wekeny God pila negir kesa dimdimjog dide iminjog yitkak ke yina omni.

25 Si onggit paemb win b'anyginena mile atogikinam, aji win walenggyam walenggyam wa rigawar kima iminjog yitkak nena opurena teyenindam. Mop nokip men re yipayipa kipear im yipaina jiwind.

26 I ra win soro taindam, win goro negir mile tamnikinam onggit soro wingirind. I goro lomkongga ripanjik waina soro omnikand, aji b'ogla wanakana ngimbla taindam.

27 Si goro win Satanam gangga okawa waina pinjog soro wimena ke.

28 I riga yet re yurowamind ikim, ton b'ogla seg rain yurowam mile. Aji ton b'ogla tinajog yim ke b'ogil wiko omnikand b'asowa yeken. Nokim da idenat ton tina yim ke omniki gasa temjiny yingg iyenam ninda riga wa pilwa yepim re gasa b'arakand wekeny.

29 I goro nanggamog yitkap kima yitkak ropekinem waina tugim ke. Aji win b'ogil

yitkak nena tapurenindam rinsim re rigap singi aukenenanj danda kima owinkam. Nokim da ra rigap tutkundenanj, si idenat ton gar sam taenanj.

<sup>30</sup> I win goro Godimna Yinayina Wingawingand gar bebigim omnena iyenya waina wimena mile ke. Nokip Yinayina Wingawingate tirir omni mal outinti yowameneny wa pilind da, win re God ma b'iga im ngirpu onggit bibirind ra yirkokar okawa mile b'utundwas dem.

<sup>31</sup> I win odede negir mile eskokinam yipand komkesa negirjog mile kima, opi re komkesa yitkap kima mile, i soro mile, i ukoi soro kima mile, i isanikesa obairena mile, i dide b'ogil mile negir omnika mile.

<sup>32</sup> Aji win walenggyam walenggyam sam kima yim b'akawa tuwenyit, i gar ke singi dide kear aena tuwenyit. I kwa win walenggyam walenggyam wa pilind omniki negir mile awir omnika teyenindam odede rija na re God waina omniki negir mile awir amnikinonj.

## 5

### *Ngayand Wimenam*

<sup>1</sup> Si win re Godimna singi iyenijog b'igawar im. Si onggit paemb win b'ogla Tina mile itaikena riga taindam.

<sup>2</sup> I win b'ogla odede yipa wip singi b'iyena milend wimena tuwenyit rija na re Keriso men singi niyeninonj dide ket Tilenggyam yirkokar b'akawonj mera map. Si ingkenaemb Ton ket meranim b'ogil ngirangngirang kima Godim singi si b'angga na awonj kus igmarkam dide imbrikam.

<sup>3</sup> Aji win goro odede mile tamnikenindam, opi re negir b'iyena mile i komkesa kilkil mile i dide butum mile, aji daka kwa goro odede mile nyi tuwatenindam wa wingirind. Mop nokip odede mile re makwa ririrjog im yina riga wa omnikam.

<sup>4</sup> I odede yit re ma b'ogiljog im wanim opurenam, opi re ingar kesa negir yit i korirkorir yit i negir kar yit. Aji siteket yit re otomantijog im wanim opurenam.

<sup>5</sup> Mop nokip win kea iminjog wumir aindam da odede rigap makwa opima owabinsi Keriso ake God, Towaina pumb tungg, opi re yigyig b'iyena mile riga, i kilkil mile riga, i dide butum mile riga. I butum mile riga re b'anyginena god aidol ewangaya riga im, nokip ton ewangaenenanj re gowukoi gasa im aji ma God na.

<sup>6</sup> I goro yet korirkorir ijongki yit ke wen wip ramnin. Mop nokip komkesa odede negir mile map ita Godimna ukoi soro kima b'isagika ik dem towa pilind yepim re maka Godind gar ke utkunda ke yokatenyi.

<sup>7</sup> Si onggit paemb goro win ton kima b'inkindena tuwenyit.

<sup>8</sup> Mop nokip naskand win sibib nat wekenot, aji yu win kea Yonggyamim pilnasim wekenyit, si win re ket ngaya nasim wekenyit. Si onggit paemb win b'ogla wimena tuwenyit ngayamna b'iga mile ririrind.

<sup>9</sup> Mop nokip ngayat kip ijagenj ra komkesa b'ogil mile wa pilkaim i negir kesa dimdimjog mile pilkae i dide iminjog yitkakim pilkae.

<sup>10</sup> Si win b'ogla mile tatonkenindam ongwatam da ringgityam milete Yonggyamind gar samim

ominy.

<sup>11</sup> I win kwa goro sibibimna kip kesa wiko yingg takatenindam. Aji win b'ogla onggityam sibib mile ngaya pita wa tapekindam ongwatam da odede mile re negir im.

<sup>12</sup> Nokip sibibimna rigap opima wigawiga ingar kima mile amnikenenanj, si daka kwa meranim odede mile opurenam re ma sobijog ingar kima im.

<sup>13</sup> Aji nanggamog sibib mile na ra win ngaya pitand tapekindam, si ngayat opima tanyowainy pitand ongwatam da odede mile re negir im namb.

<sup>14</sup> Nokip ngayat komkesa gasa pitand apekiny ongwata mim da negir e o b'ogil e. Si onggit paemb yina pebat ija emb ji yindenya da,

“Yutunga riga, win utnikina,  
i dide uj ke utnikina.

I idenat Keriso men mitnyowai pitand ongwatam.”

<sup>15</sup> Si onggit paemb win b'obogil nony kima yir b'itiyenindam ridede wip im ket win wimena tuwenyit. Goro win wimena tuwenyit korirkorir riga re dide, aji ija na opi re b'ogil multekip kima riga re dide.

<sup>16</sup> Si win b'ogla komkesa gangga takatenindam ngayamna b'ogil wiko omniam, mop nokip yu win re negir win e.

<sup>17</sup> Si onggit paemb win goro korirind tekenim, aji win b'ogla tangwatanindam nangga b'ogil mile im Yonggyam singi aeny wanim omniam.

<sup>18</sup> I win goro pip tainina ik ke, nokip onggit ikit ita negir omniam motiny. Aji win b'ogla Yinayina

Wingawinga ke yindangir taukindam, nokim da idenat Ton wen wip tamniny b'ogil mile omnikam.

19 Si win b'ogla walenggyam walenggyam yit ngole auka tuwenyit yina ger ke i esourena ger ke i dide sam kima wingawinga ger ke. I win b'ogla waina gar ke Yonggyamim pilwa sam kima ger dide yina ger tatangenendiam.

20 I kwa ita winind win b'ogla Abu Godim komkesa gasam siteket yit omnikenenya mera Yonggyam Yesu Kerisomna nyi kima.

### *Molkongga Wimena gatab Yit*

21 I win b'ogla walenggyam walenggyam b'atkaenenindam, nokip win Kerisond ita moga kima yisnaenenya.

22 Leo kima kongga! Win b'ogla walenggyam wainajog leo wa pilwa b'atkaenenindam odede ringmim re win b'akaenenindam Yonggyamim pilwa.

23 Mop nokip leo re konggam moptekip e yibim, odede ite re Keriso Tina ji sosim moptekip yibim. Si Keriso Tilenggyam re Tina ji sosim yirkokar okawayam e yibim.

24 Si ite re sosi Kerisom pilwa b'akaeneny. Si daka odede yipa wip ke kongga, win b'ogla wa leowar wa pilwa b'atkaenenindam komkesa mile wingirind.

25 Kongga kima riga! Win b'ogla wainajog kongga singi teyenindam odede ite re Keriso sosi singi yiyenonj i ket Tilenggyam sosim yirkokar b'akawonj.

<sup>26</sup> Nokim da ra sosi Tina yitim pilind gar ke utkunda oramis, idenat ket Ton nyi ke sosi kilkesa tominy i ingkek ket yina tominy.

<sup>27</sup> I kwa nokim da ra Ton itemb sosi rig kesa i oparki kesa i nanggamog odede negir kesa tominy, idenat Ton ket sosi yina dide b'injawa kesa tominy, i ket Ton Tilenggyam Ti pilwa itomb sosi tominy b'ogil inyomarena kima inikam.

<sup>28</sup> Kongga kima riga! Win b'ogla odede yipa wip nya ke wainajog kongga singi teyenindam wainajog ji wa pilwa re dide. Si yet ra tinajog konggand singi tiyeny, ton singi b'iyeny re tilenggyam e.

<sup>29</sup> Makwa ita yete tinajog ji singi kesa yomnikeneny, aji ita winind ton yutmeneny dide b'obogil yirgong yomnikeneny, odede ite re Keriso sosind yomnikeneny.

<sup>30</sup> Mop nokip komkesa men, sosi re kipear im Tina jiwind.

<sup>31</sup> Si yina pebat ija emb ji yindeny da, “Onggit mop paemb ji yipa rigat b'ogla ti b'u ake ti mog terar, i ket b'ogla ti konggam pilwa b'itinkis, i dide ket ton b'ogla nimognimog taya yipaina ji wa.”

<sup>32</sup> Si itemb re ukoi jog wigawiga yit e. Aji kon ukoi jog yitnono ainyin re Keriso dide sosi gatab yit e.

<sup>33</sup> Aji kon b'usaya nitinjin da win yipayipa rigap, mada b'ogla molenggyam moinajog konggand singi tiyenyit odede rija e re man molenggyam singi b'iyenyit. I kwa onggit konggat, madaka b'ogla mor leond moga kima isnaenenyit.

## 6

*B'u ake Mog dide B'igawar Ganggand Wimena*

*gatab Yit*

<sup>1</sup> B'iga! Win kea Yonggyamind gar ke utkunda ke yokatonda, si win b'ogla wa b'uar ake wa mogwar utkundenam. Mop nokip itemb re dimdimjog mile e wanim omniam.

<sup>2</sup> I b'ingawa yitit ija emb ji yindenya da, "Man b'ogla mor b'u ake mor mog esnae!" I itemb re naskajog b'ingawa yit e rina re God b'ogil yit kima tirir yomnonj ten (10) b'ingawa yit wingirind.

<sup>3</sup> Si itemb ji tirir omni b'ogil yit da, "Nokim da idenat komkesa gasa mornim b'ogil taukanj, i man ita pinjog yilo mitibnyit onggit gowukoyind."

<sup>4</sup> B'iga b'uwar! Widaka goro wa b'igawar sorom tamnenindam. Aji win b'ogla b'obogil gar ke utkunda riga wimenam ten esowa teyenindam dide Yonggyamimna ouyaena ke yimak yit tamnenindam. Si idenat win b'obogil odede nya ke ten tawinkindam.

*Wiko Riga dide Towa Yonggyamwar Ganggand Wimena gatab Yit*

<sup>5</sup> Wiko riga! Win b'ogla moga kima dide kaktiti aena kima waina gowukoi yonggyamwar utkundeninam garind yipaina singi kima, odede ringma re win Kerisond yutkundenenya.

<sup>6</sup> Si goro win wa yonggyamwar wa wip nenand b'obogil wiko tamnikindam ten nony sam omnenam. Aji win b'ogla iminjog kid ke Godimna singi mile tamnikenindam Kerisomna wiko riga ririrind.

<sup>7</sup> Wiko riga! Win b'ogla waina yonggyamwar wa wiko tamnikaenenindam gar sam kima odede ite re Yonggyamim pilwa re dide, aji goro odede ite re riga wa pilwa re dide.

<sup>8</sup> Si win b'ogla nonyind owamenenya da ra men yipayipa rigap b'ogil wiko tamnikenindam, men opima Yonggyamim pilke mira takatenindam dem meraina omnika ririrind, nangga ma ji da men wiko riga im o b'itrari riga im.

<sup>9</sup> Yonggyamwar! Widaka b'ogla odede yipa wip nya ke waina wiko riga tamnikenindam, i b'itiswangindam b'anyginena nya ke ten isammenam. Nokip win wumir im da towaina dide waina Yonggyam re yipaina e dide ita Ton de pumb tungg wa yibim, i Ton makwa ita bu b'iyena mile omnika, aji komkesa riga yipa ririr nasim singi teyeniny.

### *Wingawinga ke Kupka Geja Gasa B'ikokam*

<sup>10</sup> Kikitumam nitindenyin. Win b'ogla Yonggyamind gar ke utkunda ke gar seo okatenya, i ket Tina ukoi jog seo ke towinkindam.

<sup>11</sup> I win b'ogla komkesa Godimna geja gasa b'itkokindam, nokim da idenat win ket ririrkip towinkindam Satana kima geja omnika ra ton rabem omnena nya ke otonkena teyeniny b'anyginena nya yimta undokam.

<sup>12</sup> Mop nokip meraina b'ipowa re ma gim ke riga kima e yepim re kus dide mi kima wekeny, aji ton kima im, opi re negir aneru yepim re wekeny wip iyena danda kima dide ukoi nyi kima, i onggit sibibimna gowukoi wip iyoyam, i dide negir jog wingawinga yepim re wekeny pumb tungg nata.

<sup>13</sup> Si onggit paemb Godimna kupka geja gasa ke b'ajgina, nokim da idenat win ririrkip towinkindam geja wip owarkitam onggit negir jog bibirind rina ra towa pilke b'ajgatena pita tainy



dem, ngirpu ra komkesa gou wa tamnindam dem, win ket onggit kak ke dikinda owinki tekenyit dem.

<sup>14</sup> Si onggit paemb win b'ogla iminjog yitkak kima towinkindam, odede ringma ra geja rigat robmopind rob b'ibgi towinyis geja omniam, i win b'ogla Kerisomna negir kesa dimdimjog riga nyi b'itkisyia odede ringma ra geja rigat dorkakind dorkak b'utwangkapu gasa b'ikiti owam,

<sup>15</sup> i win b'ogla b'angonjeni tekenyit ngimbla kima God ma b'ogil yirkokar bage yit pitapita omnenam, odede ringma ra geja rigat piti b'ikoki ibim gejam menonim.

<sup>16</sup> I win kwa b'ogla ita winind gar ke utkunda emorka iyenya i ingkaemb win ket ririr taindam negirjog rigamna komkesa wul dimil pila b'ajgatena nim gou wa omnenam, odede ringma ra geja rigat nim iteorenapu gasa yimind owama iyeny, i ingkaemb tina geja rigaina komkesa dimil kima nim ena tagnateninny.

<sup>17</sup> I win b'ogla b'obogil onggityam yirkokar emorka iyenya rina re win gar ke utkunda ke yokatonda, odede ringma ra geja rigat mop utwangkapu dira b'ikiti owam. I kwa win b'ogla emorka iyenya Godimna yitkak rinte re Yinayina Wingawinga geja giri pila ingaena yiyeny.

<sup>18</sup> I win b'ogla ita winind Yinayina Wingawinga kima b'itinkenendim yir opmitenam komkesa b'engabenga wip yir opmita ke dide b'igekena ke. Si win yir kima na tekenyit dide ita winind mimkam wimena na tuwenyit yir opmitenam, i idenat win yir topmitenindam komkesa yina riga wa gatab.

<sup>19</sup> I win b'ogla kornim daka yir topmitenindam da ra kon God ma yit riga wa pilwa opurenam omnyin, God opima yitkak notkainy moga kesa wigawiga yitkak wumir omnenam rinsim re God ma b'ogil yirkokar bage yit wingirind wekeny.

<sup>20</sup> I kon Kerisomna nyi kima yit opurena riga awond re onggityam God ma b'ogil yirkokar bage yit pitapita omnena mana. I yu ket kon sibimetind nibnyin re onggit yit opurena ma. Si kon b'ogla moga kesa yit tapureninyin Kerisomna nyi kima yit opurena riga ririrind. Si onggit paemb win kor gatab yir topmitenindam, nokim da idenat kon moga kesa danda kima onggityam bage yit tapureninyin.

### *Undwatapu Yitkak*

<sup>21</sup> Si kon Tikikond itmikisin wa pilwa yete re mera singi iyeni gar ke utkunda riga yibim, i yete re Yonggyamimna wikond nony ijawa kima b'akaeneny. Nokim da idenat wen wumir tameniny komkesa gatab rija e kon nibnyin i kwa nangga im kon omnika eyeninyin.

<sup>22</sup> Si itemb ji mop nangga pae kon tin wa pilwa itmikisin. Si idenat win wumir taukindam sowa gatab, i kwa ton ita danda kima tugoiny wen gar ngimbla omnam koina b'idgotnena gatab.

<sup>23</sup> Gar ke utkunda nany dide yingganwar! Abu Godim pilke dide Yonggyam Yesu Kerisom pilke ngimbla dide gar ke utkunda ke singi b'iyena mile win kima.

<sup>24</sup> Wurar komkesa ton kima yepim re mera Yonggyam Yesu Kerisond ipendi kesa singi yiyenyi.

**Wipi Yit God ma Yina Sisil Yina Peba**  
**The New Testament in the Wipi Language of Papua**  
**New Guinea**  
**Nupela Testamen long tokples Wipi long Niugini**

Copyright © 2001 The Bible Society of Papua New Guinea

Language: Wipi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-10-13

---

PDF generated using Haiola and XeLaTeX on 28 Dec 2024 from source files dated 31 Aug 2023

a5a5213a-fb12-52b5-9c99-efb8044c6646